

印顺法师 佛学著作全集

第二十一卷



杂阿含经论会编（中）




中华书局

印顺法师 佛学著作全集

第二十一卷

杂阿含经论会编（中）



中华书局

第二十一卷目录

杂阿含经论会编（中）（1——399）

目 录

杂因诵第三 1

 缘起食谛界择摄第三..... 1

 三 因缘相应..... 1

 四 谛相应 88

 五 界相应..... 140

 六 受相应..... 165

道品诵第四 191

 菩提分法择摄第四..... 191

 七 念处相应..... 191

 八 正断相应..... 241

 九 如意足相应..... 246

 一〇 根相应..... 252

 一一 力相应..... 262

 一二 觉支相应..... 282

 一三 圣道分相应..... 313

 一四 安那般那念相应..... 342

 一五 学相应..... 365

 一六 不坏净相应..... 381

杂因诵第三^①

缘起食谛界择摄第三^②

三 因缘相应^③

如是已说处择摄，缘起、食、谛、界择摄，我今当说。

总喼陀南曰：

立等、二谛等，以触为缘等，有灭等、食等，最后如理等。

别喼陀南曰：

立、苦聚、谛观，摄圣教、微智，思量际、观察，上慢、后甚深。

“立”：略由三相，应知建立缘起差别：一、从前际中际得生；

① “杂因诵第三”，原本卷一三——二三，共十一卷，与《相应部》第二“因缘篇”相当。卷一八以下，今分别编入“弟子所说诵”、“如来所说诵”。前五卷为“杂因诵”主体，分“因缘”、“谛”、“界”、“受”——四种相应。

② “缘起食谛界择摄”，为《瑜伽师地论·摄事分》中，抉择契经宗要之第三分，自卷九三起。

③ “因缘相应”，共七十八经，与《相应部》(一二)“因缘相应”相当。

二、从中际后际得生；三、于中际生已随转，及趣清净。此中云何从其前际中际得生，及于中际生已随转？谓如有一，宿非聪慧，无明为缘，造作增长罪、福、不动，身、语、意业，由此为缘，随业行识，乃至命终随转不绝，能为后世续生识因。如是展转，有内、外爱，识生果时，能为助伴，现前而起。既命终已，由前际因，于现在世自体得生，生已渐次，于母腹中，因识为缘续生果识，随转不绝，任持所有羯逻蓝等名色分位；后后殊胜，始从胎藏乃至衰老。又即此识当续生时，能感生业，与异熟果，异熟生识复依名色相续而转，谓依眼等六根^①转故，由是说言名色缘识。俱生五根，说名为色；无间灭等，说名为名。随其所应，能与六识作所依止，识依彼故，乃至命终数数随转。又五色根，根依大种，根处大种所生诸色，及诸余名，由彼执持所有根等，堕在相续流转不绝。此二总名随转依止，由是故言：识缘名色，名色缘识，于现在世，犹如束芦相依而转，乃至寿住。如是名为从其前际、中际缘起诸行得生；于其中际，生已随转。当知此中依胎生者说转次第，卵生、湿生，除在母腹。有余差别：有色有情，在欲、色界受化生者，于初生时诸根圆满，与余差别；在无色界诸有情类，识依于名及色种子，名及色种依识而转，由彼识中有色种故，色虽间断后当更生，如是名为此中差别。由福业故，生于欲界人、天两趣；由罪业故，生恶趣中；由不动业，生色、无色。云何名为从其中际、后际缘起诸行得生？云何不生，由不生故证得清净？谓彼如是于中际生补特伽罗，领受先业所得二果：一者、领受内异熟果，二

① “根”，原作“依”，依宋本改。

者、领受境界所生受增上果。彼由听闻不正法故,或由先世串习力故,于二种果发起愚痴。彼由于内异熟果中有愚痴故,不能如实了知当来后有生苦,由此前际、后际无明增上力故,如前造作增长诸行,由此新业熏变识故,于现法中随业而行,如是无明以为缘故诸行得生。行为缘故,令识转变,当知此识于现法中但是因性,摄受当生诸识果故,约就一切相续为名,说六识身。又即此识,当来后有名色种子之所随逐;名色种子,复为当来后有六处种子随逐;六处种子,复为当来后有诸触种子随逐;此触种子,复为当来后有诸受种子随逐。当知是名于其中际后有引因,由识为先,受为最后,遍能牵引诸自体故。如是由先异熟果愚引后有已,复由第二境界所生增上果愚,缘境界受,发生贪爱。由此爱故,或求诸欲,或求诸有。又取欲取,或取见、戒禁、我语取。取诸取已,爱、取和合,润先引因,转名为有,是当生起因所摄故。此有无间,既命终已,如其引因所引诸行,识为最初,受为最后,或渐次生,或复顿生。如是应知,于现法中,初用无明触所生受为缘生爱;爱为缘故,次生于取;取为缘故,转成其有;有为缘故,当生得生;生为缘故,老、病、死等众苦差别次第现前。当知此中,或有处所生处现前,或有处所种子随逐,如是中际无明缘行、受缘爱等,能生后际缘起诸行。若现法中,从他闻法,或于先世已集资粮,由彼为因,能于二种果性诸行如理思惟:若于彼因,若于彼灭,若趣灭行,如理作意思惟彼故,发生正见。又于诸谛,渐次获得有学、无学清净智见,彼由如是智、见力故,能无余断无明及爱。由彼断故,即彼所缘不如实知诸无明触所生诸受,亦复随断。由此断故,于现法中,由离无明,证慧解脱;又无明触所生诸

受相应心中,所有相应贪爱烦恼,彼于其心亦得离系,由离贪故,证心解脱。又即由彼无明灭故,诸有无明犹未断时,依于后际应生行识,乃至诸受,皆不得生,成不生法,是故说言:无明灭故,诸行随灭,次第乃至异熟所生诸触灭故,异熟所生诸受随灭。又现法中无明灭故,无明触灭;由无明触永得灭故,从无明触所生受灭;由无明触所生诸受永得灭故,爱亦随减;由爱灭故,如前说名所有取等,乃至损恼以为后边诸行皆灭,成不生法。于现法中,如是诸行皆不流转,不流转故,于现法中住有余依般涅槃界,名为证得现法涅槃。彼于尔时,识缘名色,名色缘识,有余未灭,而得说名清净鲜白;乃至有识身住未灭,彼恒领受离系诸受,无有系缚。彼有识身乃至先业所引寿量,恒相续住;寿量若尽,能执持识舍所执身,命根亦舍,从此已后,所有灭根无余永灭,都无所有。又彼诸识与一切受,于此位中任运而灭,先因灭故,余更不续,亦无余灭,由此道理,名无余依般涅槃界,究竟寂静,常住,妙迹。为此义故,常随涅槃,常以涅槃为其究竟,于世尊所熟修梵行。是名广说由三种相,建立缘起:谓从前际中际流转,从其中际后际流转,复于中际流转,清净。

—①

四六四(二八三)

②如是我闻:一时,佛住舍卫国祇树给孤独园。尔时,世尊告诸比丘:“若于结所系法,随生味著,顾念,心缚则爱生;爱缘取,取缘有,有缘生,生缘老病死、忧悲恼苦,如是如是纯大苦聚

① 《相应部》(一二)“因缘相应”五七经。参考五五·五六经。

② 《杂阿含经》卷一三(旧误编为卷一二)。

集。如人种树,初小软弱,爱护令安,壅以粪土,随时溉灌,冷暖调适,以是因缘,然后彼树得增长大。如是比丘结所系法,味著将养则生恩爱;爱缘取,取缘有,有缘生,生缘老病死、忧悲恼苦,如是如是纯大苦聚集。若于结所系法,随顺无常观,住生灭观、无欲观、灭观、舍观,不生顾念,心不缚著,则爱灭;爱灭则取灭,取灭则有灭,有灭则生灭,生灭则老病死、忧悲恼苦灭,如是如是纯大苦聚灭。犹如种树,初小软弱,不爱护,不令安隐,不壅粪土,不随时溉灌,冷暖不适,不得增长。若复断根、截枝,段段斩截,分分解析,风飘、日炙,以火焚烧,烧以成粪,或颺以疾风,或投之流水。比丘!于意云何?非为彼树断截其根,乃至焚烧,令其磨灭,于未来世成不生法耶?”答言:“如是,世尊!”“如是比丘!于结所系法,随顺无常观,住生灭观、无欲观、灭观、舍观,不生顾念,心不缚著则爱灭;爱灭则取灭,取灭则有灭,有灭则生灭,生灭则老病死、忧悲恼苦灭,如是如是纯大苦聚灭。”佛说此经已,诸比丘闻佛所说,欢喜奉行。

二①

四六五(二八四)

如是我闻:一时,佛住舍卫国祇树给孤独园。尔时,世尊告诸比丘:“若于所取法,随生味著,顾念,心缚②,其心驱驰,追逐名色;名色缘六入处,六入处缘触,触缘受,受缘爱,爱缘取,取缘有,有缘生,生缘老病死、忧悲恼苦,如是如是纯大苦聚集。譬大树,根干、枝条、柯叶、花果,下根深固,壅以粪土,溉灌以水,彼树坚固,永世不朽。如是比丘!于所取法,随生味著,顾念、心缚,

① 《相应部》(一二)“因缘相应”五八·五九经。

② “心缚”,原本作“缚心”,依宋本改。

其心驱驰,追逐名色;名色缘六入处,六入处缘触,触缘受,受缘爱,爱缘取,取缘有,有缘生,生缘老病死、忧悲恼苦,如是如是纯大苦聚集。若于所取法,随顺无常观,住生灭观、无欲观、灭观、厌观,心不顾念,无所缚著,识则不驱驰追逐名色,则名色灭;名色灭则六入处灭,六入处灭则触灭,触灭则受灭,受灭则爱灭,爱灭则取灭,取灭则有灭,有灭则生灭,生灭则老病死、忧悲恼苦灭,如是如是则纯大苦聚灭。犹如种树,不随时爱护,令其安隐,不壅粪土,不随时溉灌,冷暖不适,不得增长。若复断根、截枝,段段斩截,分分解析,风飘、日炙,以火焚烧,烧以成粪,或颺以疾风,或投之流水。比丘!于意云何?非为彼树断截其根,乃至焚烧,令其磨灭,于未来世成不生法耶?”答言:“如是,世尊!”“如是比丘!于所取法,随顺无常观,住生灭观、无欲观、灭观、舍观,不生顾念,心不缚著,识不驱驰追逐名色,则名色灭;名色灭则六入处灭,六入处灭则触灭,触灭则受灭,受灭则爱灭,爱灭则取灭,取灭则有灭,有灭则生灭,生灭则老病死、忧悲恼苦灭,如是如是^①纯大苦聚灭。”佛说此经已,诸比丘闻佛所说,欢喜奉行。

(九相):复次,安立九相,后有苦树能生当有。谓有世间非聪慧者,于现法中所造新业,如小苦树。若彼世间非聪慧者,于能随顺诸漏处所,依现在世随观爱味,依过去世深生顾恋,依未来世专心系著。如是住已,先所未断一切贪爱,由数习故转更增长。此非聪慧补特伽罗,欲令如是后有小树复加滋茂,以贪爱水而恒溉灌,令如前说能感当来,取所得果,渐次圆满。若有多闻

① 原本缺“如是”二字,依宋本补。

诸圣弟子,虽造有漏能感当来诸业小树,然于能顺烦恼诸行,无倒随观生灭法性,于断、无欲及以灭界,无倒随观是寂静性,损减彼业,不令增长,使其爱水亦皆消散。故聪慧者,不欲滋荣后有小树,便断其爱、爱缘取等。损坏如是后有小树,尚令一切皆无所有,何况使其后更增长!

复更有一补特伽罗,已生自体,诸先所有造作增长顺后受业,于现法中为其所系;即彼自体及先所造顺后受业,总摄为一,说名后有,如大苦树。若于能顺诸烦恼法,如前乃至专心系著,如是住已,彼先所造顺后受业,如直下根,令树郁茂;于现法中,彼爱烦恼,如傍注道,令树润泽。以此为因,令随惑业行一切种子识,于当来世正续生时,住于名色,如是苦树长时安立。当知如是补特伽罗,欲令苦树展转滋茂。此中白品,如前应知。

三①

四六六(二八五)

如是我闻:一时,佛住舍卫国祇树给孤独园。尔时,世尊告诸比丘:“我忆宿命,未成正觉时,独一静处,专精禅思,生如是念:世间难入,所谓若生、若老、若病、若死、若迁,若受生,然诸众生生、老、死,上及所依,不如实知。我作是念:何法有故生有?何法缘故生有?即正思惟,起无间等知,有有故生有,有缘故生有。复思惟:何法有故有有?何法缘故有有?即正思惟,如实无间等起知,取有故有有,取缘故有有。又作是念:取复②何法有故取有?何法缘故取有?即正思惟,如实无间等起知,取法味

① 《相应部》(一二)“因缘相应”五三·五四经。参考“因缘相应”一〇经。

② “复”下,原本衍“何缘”二字,今删。

著、顾念、心缚,爱欲增长,彼爱有故取有;爱故缘取,取缘有,有缘生,生缘老病死、忧悲恼苦,如是如是纯大苦聚集。诸比丘!于意示何?譬如缘膏油及炷,灯明得烧,数增油、炷,彼灯明得久住不?”答言:“如是,世尊!”“如是诸比丘!于色取味著,顾念、心^①缚,增长爱缘故取,取缘有,有缘生,生缘老病死、忧悲恼苦,如是如是纯大苦聚集。我时复作是念:何法无故无此老病死?何法灭故老病死灭?即正思惟,起如实无间等,无生则无老病死,生灭故则老病死灭。复作是念;何法无故无生?何法灭故生灭?即正思惟,起如实无间等,有无故生无,有灭故生灭。又复思惟:何法无故有无?何法灭故有灭?即正思惟,生如实无间等观,取无故有无,取灭故有灭。又作是念:何法无故取无?何法灭故取灭?即正思惟,生如实无间等观,所取法无常、生灭、离欲、灭尽、舍离,心不顾念,心不缚著,爱则灭;彼爱灭故取灭,取灭故有灭,有灭故生灭,生灭故老病死、忧悲恼苦灭,如是如是纯大苦聚灭。诸比丘!于意云何?譬如油、炷然灯,若不增油、治炷,非彼灯明未来不生、尽、磨灭耶?”比丘白佛言^②:“如是,世尊!”“如是诸比丘!于所取法,观察无常、生灭、离欲、灭尽、舍离,心不顾念,心不缚著,爱则灭;爱灭则取灭,乃至纯大苦聚灭。”佛说此经已,诸比丘闻佛所说,欢喜奉行。

四^③

四六七(二八六)

如是我闻:一时,佛住舍卫国祇树给孤独园。尔时,世尊告

① “心”,原本作“爱”,准前后文改。

② “言”,原本缺,依宋本补。

③ 《相应部》(一二)“因缘相应”五二经。

诸比丘：“我忆宿命，未成正觉时，独一静处，专精禅思，如上广说。差别者：譬如载樵十束、二十束、三十束、四十束、五十束、百束、千束、百千束，积聚烧然，作大火聚。若复有人增其干草、樵薪，诸比丘！于意云何？此火相续，长夜炽然不？”比丘白佛言：“如是，世尊！”“如是诸比丘！于所取法，味著、顾念、心缚著，增其爱缘取，取缘有，乃至纯大苦聚集。诸比丘！若彼火聚炽然，不增樵草，诸比丘于意云何？彼火当灭不？”答言：“如是，世尊！”“如是诸比丘！于所取法，观察无常、生灭、离欲、灭尽、舍离，心不顾念，缚著，爱则灭；爱灭则取灭，如是广说乃至纯大苦聚灭。”佛说此经已，诸比丘闻佛所说，欢喜奉行。

“苦聚”：复次，世尊在昔为菩萨时，弃前所得诸世俗道及世诸师，处菩提座，为欲悲愍利他有情以为上首，自于诸谛起正观察。尔时为欲历观苦谛，由老死支苦谛所摄，故于缘起逆历观察。当知此中，由三种相，于其老死如理观察：一者、观察细因缘故，二者、观察粗因缘故，三者、观察非不定故。感生因缘，亦名为生；即生自体，亦名为生。前生是细，后生为粗。此中观前细生有故而有老死，亦观由后粗生缘故得有老死；当来老死，细生为因，现法老死，粗生为因。云何名为非不决定？谓即除彼生处所摄二种生体，余定无能与老死果。如观老死，生、有、取、爱，各由二种如理观察，当知亦尔。如是名为始从老死，次第逆观苦、集二谛缘起道理。应知此中，顺集谛法犹如灯炷，即此集谛如膏油等，苦谛类灯。诸非聪慧补特伽罗，譬于灌油并集炷者，如是苦灯烧然长世。当知白品，与此相违，谓善方便观灭、道谛。复有二种补特伽罗，何等为二？一、唯行自非利益行，谓但于已集

炷、灌油，令一苦灯相续久住。二、复有余补特伽罗，兼行自、他无量大众非利益行，为然自、他大苦火聚。摄受听闻邪法为先，闻、思、修慧所引邪行，譬如积集干薪、干草及干牛粪，由是因缘，令苦火聚长时炽然，无有断绝。

五^①

四六八(二八七)

如是我闻：一时，佛住舍卫国祇树给孤独园。尔时，世尊告诸比丘：“我忆宿命，未成正觉时，独一静处，专精禅思，作是念：何法有故老死有？何法缘故老死有？即正思惟，生如实无间等，生有故老死有，生缘故老死有。如是有……取……爱……受……触……六入处……名色，何法有故名色有？何法缘故名色有？即正思惟，如实无间等生，识有故名色有，识缘故有名色有。我作是思惟时，齐识而还，不能过彼：谓缘识名色，缘名色六入处，缘六入处触，缘触受，缘受爱，缘爱取，缘取有，缘有生，缘生老病死、忧悲恼苦，如是如是纯大苦聚集。我时作是念：何法无故〔则〕老死无？何法灭故老死灭？即正思惟，生如实无间等，生无故老死无，生灭故老死灭。如是生、有、取、爱、受、触、六入处、名色、识、行广说。我复作是思惟：何法无故行无？何法灭故行灭？即正思惟，如实无间等，无明无故行无，无明灭故行灭；行灭故识灭，识灭故名色灭，名色灭故六入处灭，六入处灭故触灭，触灭故受灭，受灭故爱灭，爱灭故取灭，取灭故有灭，有灭故生灭，生灭故老病死、忧悲恼苦灭，如是如是纯大苦聚灭。我时

① 《相应部》(一二)“因缘相应”六五经。《增一阿舍经》(三八)“力品”四经。

作是念：我得古仙人道，古仙人迳，古仙人道迹；古仙人从此迹去，我今随去。譬如有人游于旷野，披荒觅路，忽遇故道、古人行处，彼则随行。渐渐前进，见故城邑，故王宫殿，园观、浴池，林木清静。彼作是念：我今当往白王令知。即往白王：大王当知！我游旷野，披荒求路，忽见故道、古人行处，我即随行。我随行已，见故城邑，故王宫殿，园观、浴池，林流清静。大王可往，居止其中。王即往彼，止住其中，丰乐安隐，人民炽盛。今我如是，得古仙人道，古仙人迳，古仙人迹；古仙人去处，我得随去，谓八圣道：正见，正志，正语，正业，正命，正方便，正念，正定。我从彼道，见老病死，老病死集，老病死灭，老病死灭道迹。见生……有……取……爱……受……触……六入处……名色……识……行，行集，行灭，行灭道迹。我于此法，自知、自觉，成等正觉。为比丘、比丘尼、优婆塞、优婆夷，及余外道，沙门，婆罗门，在家、出家，彼诸四众，闻法正向！信乐知法善，梵行增广，多所饶益，开示显发。”佛说此经已，诸比丘闻佛所说，欢喜奉行。

“谛观”：复次，世尊在昔为菩萨时，处菩提座，依缘起门，逆次而入。先缘后际，如理思惟老死苦谛，乃至其爱，如是观察后际苦谛，及后际苦所有集谛。未为喜足，遂复观察后际集谛因缘所摄现在众苦，谓遍逆观受、触、六处、名色与识。当知此中观未来苦，是当苦谛；观彼集因，是当集谛。观未来世苦之集谛，由谁而有，知由从先集所生起，识为边际现法苦有。既知从先集所生起，不应复观此云何有，是故世尊昔菩萨时，为观当来所有苦、集，观现在苦，乃至作意相应心识而复转还。又为渐次观彼后际集谛依处，后际苦谛所依止处，当知即是后际集谛，故乃至识，复

还顺上。如是顺、逆,如理观察缘起苦、集,从此无间,为观灭谛,始从老死逆次第入,乃至无明。何以故?观察如是现在苦谛,云何一切皆悉尽灭?谓不造作无明为缘新业行故。如是历观三圣谛已,次更寻求此灭圣谛,何道何行而能证得?由如前说,宿住随念,忆昔为求诸漏永尽世间正见,如教授者令现在前。作是思惟:我今证得先旧正道,古昔诸仙同所游履,如是但以世间作意历观四谛。又以正见,于诸谛中得入现观,次第方便,证觉无上正等菩提;现见方便,获得无漏有学、无学善净智见。为此义故,于三大劫阿僧企耶修行一切难行之行,今于此义皆已证得。为利他故,哀愍世间诸人天故,随有堪能入圣法者,开四圣谛,令生等觉。

六①

四六九(二八八)

如是我闻:一时,佛住王舍城迦兰陀竹园。尔时,尊者舍利弗、尊者摩诃拘絺罗,在耆闍崛山。尔时,尊者舍利弗,晡时从禅觉,诣尊者摩诃拘絺罗,共相问讯庆慰已,于一面坐。语尊者摩诃拘絺罗:“欲有所问,宁有闲暇见答与不?”尊者摩诃拘絺罗语尊者舍利弗言:“仁者且问,知者当答。”尊者舍利弗问尊者摩诃拘絺罗:“云何尊者摩诃拘絺罗!有老不?”答言:“有。”尊者舍利弗复问:“有死不?”答言:“有。”复问:“云何老死自作耶?为他作耶?为自他作耶?为非自非他无因作耶?”答言:“尊者舍利弗!老死非自作,非他作,非自他作,亦非非自他作无因作,然彼生缘故有老死。”“如是生……有……取……爱……受……

① 《相应部》(一二)“因缘相应”六七经。

触……六入处……名色为自作？为他作？为自他作？为非自他无因作？”答言：“尊者舍利弗！名色非自作，非他作，非自他作，非非自他作无因作，然彼名色缘识生。”复问：“彼识为自作？为他作？为自他作？为非自非他无因作？”答言：“尊者舍利弗！彼识非自作，非他作，非自他作，非非自他作无因作，然彼识缘^①名色生。”尊者舍利弗复问尊者摩诃拘絺罗：“先言名色非自作，非他作，非自他作，非非自他作无因作，然彼名色缘识生，而今复言名色缘识，此义云何？”尊者摩诃拘絺罗答言：“今当说譬，如智者因譬得解。譬如三芦，立于空地，展转相依而得竖立。若去其一，二亦不立；若去其二，一亦不立，展转相依而得竖立。识缘名色，亦复如是，展转相依而得生长。”

尊者舍利弗言：“善哉！善哉！尊者摩诃拘絺罗！世尊声闻中，智慧、明达，善调、无畏，见甘露法，以甘露法具足身作证者，谓尊者摩诃拘絺罗，乃有如是甚深义辩，种种难问，皆悉能答！如无价宝珠，世所顶戴，我今顶戴尊者摩诃拘絺罗，亦复如是。我今于汝所，快得善利，诸余梵行数诣其所，亦得善利，以彼尊者善说法故。我今以此尊者摩诃拘絺罗所说法故，当以三十种赞叹、称扬、随喜。尊者摩诃拘絺罗，说老死厌患，离欲，灭尽，是名法师；说生、有、取、爱、受、触、六入处、名色、识厌患，离欲，灭尽，是名法师。若比丘于老死，厌患，离欲，灭尽向，是名法师；乃至识，厌患，离欲，灭尽向，是名法师。若比丘于老死，厌患，离欲，灭尽，不起诸漏，心善解脱，是名法师；乃

① “缘”，原本作“增”，依元本改。